

Siunnersuummut nassuiaatit

Oqaaseqaatit nalinginnaasut

1. Aallarniut

Utoqqaat illersuiannik pilersitsisoqarnissaa sulissutigineqassasoq Naalakkersuisut naalakkersuisooqatigiinnissamik isumaqatigiissutaanni allassimavoq.

Naalakkersuisut utoqqaat pillugit politikkimik suliaqarnerannut atatillugu aamma utoqqaat illersuisuannik pilersitsisoqarnissaa isigineqassaaq. Naalakkersuisooqatigiinnissamik isumaqatigiissut malillugu tassanilu siunertat piviusunngortinniarlugit utoqqarnut suliaasaqarfimmi politikkimik ataatsimoortumik suliaqartoqassasoq Naalakkersuisut kissaatigaat, matumani utoqqarnut suliaasaqarfimmi unammilligassat tamakkiisumik ersersinneqassallutik.

Maannamut, Inatsisartut inatsisaat nr. 11, 22. november 2011-meersoq naapertorlugu Meeqqat illersuisuannik pilersitsisoqarsimavoq, aamma Inatsisartut inatsisaat nr. 1, 29. maj 2017-imeersoq naapertorlugu Inuit innarluutillit illersuisuannik pilersitsisoqarsimavoq. Inatsisit taakku marluk Naalagaaffiit Peqatigiit meeqqat pisinnaatitaaffii pillugit aamma inuit innarluutillit pisinnaatitaaffii pillugit isumaqatigiissutaannit aallaaveqarput. Illersuisoqarfittut aaqquussat taakku marluk Utoqqaat illersuisuannik pilersitsinissaq pillugu matumani siunnersuummut isumassarsiorfiusimapput, kisianni Utoqqaat illersuisuannik pilersitsineq Naalagaaffiit Peqatigiit isumaqatigiissutaannik aallaaveqanngilaq.

2. Siunnersuummi immikkoortut pingaarnertit

Siunnersuutip, Utoqqaat illersuisup, utoqqaat soqutigisaannik inuiaqatigiinni siuarsaasinnaasup, kiisalu utoqqaat inuiaqatigiinni atugaasa ukkanneqarlutillu paasisitsiniutigineqarnissaannik sulissutiginnissinnaasup sinaakutissaanik pilersitsinissaq siunertaraa. Suliamut tassunga atatillugu Utoqqaat illersuisuata utoqqaat atugarisai pillugit ilisimalikkat politikerinut, oqartussanut, kattuffinnut innuttaasunullu ingerlateqqittassavai.

Utoqqaat illersuisuannik politikikkut attuumassuteqanngitsumik erseqqissumik pisinnaatitaaffilerneqartumik siamasissumillu ilisimasaqartumik pilersitsinissaq siunertaavoq. Siamasissumik ilisimasaqarneq, Utoqqaat illersuisuata isumaginninnermut aqutsisoqarfimmi ilisimasaqarnermik pisariaqartumik naatsorsuutigineqartumik qulakkeerinnissinnaasumi allattoqarfeqarneratigut qulakkeerneqassaaq.

Utoqqaat illersuisuat

Utoqqaat illersuisuat utoqqarnut tamanut illersuisuussaaq. Utoqqaat illersuisuata suliaanut utoqqaat sapinngisamik peqataatinneqassapput.

Utoqqaat illersuisuat utoqqarnut atugassarititat pillugit utoqqarnut allanullu soqutigisaqaqatigiinnut siunnersuisinnaallunilu ilitersuisinnaavoq. Utoqqaat illersuisuat utoqqarnut atugassarititaasut patajaallisaaffigineqarnissaat siunertaralugu suliniutissanik nutaanik siunnersuuteqarsinnaavoq. Utoqqaat illersuisuata aalajangersimasumik tusarniaaffigineqartartutut utoqqaat atugarisaat pillugit inatsisiliornerit, qulaajaanerit pilersaarusiorderillu nammineerluni nalilersorlugillu oqaaseqarfigisinnaavai. Utoqqaat atugarliortut Utoqqaat illersuisuata immikkut isiginiartussaavai.

Utoqqaat ilaasa pisinnaatitaaffimminnik iluaquteqassagunik siunnersorneqarnissaq ilitersorneqarnissarlu pisariaqartippaat. Suliassa qarfiit ilaanni ilanngutsitsisarnermik aalajangeeqataasarnissamillu qulakkeerinnineq immikkut ittumik amigaatigineqarput. Tamakku malitsigisaannik Utoqqaat illersuisuata suliassa qarfiit utoqqaat atugaanni ajornakusoorfiusut suussusersissavai, taakkulu politikerinut, oqartussaasunut innuttaasunullu ingerlateqqillugit.

Pisinnaatitaaffinnut tunngatillugu utoqqaat atugaannut tunngatillugu ersarissumik ajornanngitsumillu pitsaassusilimmik siunnersorneqartarnissaat ilitersorneqartarnissaallu qulakkiissallugu Utoqqaat illersuisuata suliassarivaa.

Utoqqaat illersuisuat nammineerluni saaffigineqarnermiluunniit kinguneranik iliuuseqarsinnaavoq. Kikkut tamarmik Utoqqaat illersuisuannut saaffiginnissinnaatitaapput. Utoqqaat salliutinneqassapput.

Utoqqaat illersuisuata aammattaaq utoqqaat atugaannut tunngasunik ilisimasanik siaruarterinissaq suliassaraa. Atugarisat atituumik paasineqassapput, tassanilu utoqqaat inooqataanikkut, aningaasaqarnikkut, peqqissutsikkut aamma piorsarsimassutsikkut atugarisaat tamarmik pineqarput.

Utoqqaat illersuisuat utoqqarnik atugaat pillugit eqeersimaartumik illersuisaaq. Utoqqaat utoqqarnut attaveqarnermik pilersitsisassaaq, taamaaliornikkut utoqqaat Utoqqaat illersuisuata sulineranut peqataalersillugit.

Utoqqaat illersuisuata akuunera suliffeqarfimmillu saqqumilaartitsinera taassuma innuttaasuni kiisalu kattuffinnut oqartussanullu allanut tunngatillugu sunniuteqarsinnaaneranut ataqineqarneranullu pingaaruteqassapput.

Allattoqarfik

Utoqqaat illersuisoqarfiat tassaavoq Utoqqaat illersuisuat allattoqarfialu. Isumaginninnermut aqutsisoqarfik Utoqqaat illersuisuannut allattoqarfimmik isumaginnittuuvoq.

Allattoqarfiup sullissineranut aningaasartuutit isumaginninnermut aqutsisoqarfimmut nalinginnaasumik ingerlatsinnermut aningaasaliissutit iluanni isumagineqartassapput.

Aamma allattoqarfik pillugu oqaaseqaatit innersuussutigineqarput § 9.

2.1. Utoqqaat illersuisuata Inatsisartut Ombudsmandiannut attuumassuteqarnera

Utoqqaat illersuisuat aamma Inatsisartut Ombudsmandiat imminnut attuumassuteqanngitsumik nakkutilliisartuupput marluk. Ombudsmandi aaqqissuussaannermigut Inatsisartut ataanni inissisimavoq, taakkulu inatsisiliortuupput, akerlianik Utoqqaat illersuisuat aaqqissuussaannermigut Naalakkersuisut, inatsisunik atuutsitsisut, ataanni inissisimavoq, tak. namminersorneq pillugu inatsisip § 1-iani pissaanerup agguarneqarneranut tunngavik, tunngavigalugu Danmarkip naalagaaffiata tunngaviusumik inatsisaani § 3.

Suliani utoqqaat soqutigisaat eqqarsaatigalugit inatsisini amigaateqartoqarnera ilisimatitsissutigineqartariaqaraangat Utoqqaat illersuisuat aamma Inatsisartut Ombudsmandiat oqaaseqarsinnaatitaapput.

Suliffeqarfiit taakku 2-t suliassaqarfimminnik qalleraatilersinnaanerat ilimagineqanngilaq, tassa Inatsisartut Ombudsmandiata iluarsaasseqqinnernik minnerusumik suliaqartarmat, kiisalu Utoqqaat illersuisuata utoqqaat soqutigisaat inatsisitigut inuiaqatigiillu tamarmiusut eqqarsaatigalugit siuarsaanermik suliaqarnerusarnera pissutigalugit.

Aammattaaq sullissiviit tunuliaqutaat qitiutillugillu suliaat assigiinngitsuummata, ajornartorsiut aalajangersimasoq pillugu assigiinngitsunik sullissiviit taakku 2-t oqaaseqarsinnaanerat ajornartorsiutitaqassanngitsoq naatsorsuutigineqarpoq. Tassa pisuni pisortani oqartussat aalajangiiffigisaanni Ombudsmandi isornartorsiuisalluni tunngavissaqanngikkaangat, Utoqqaat illersuisuat isornartorsiuisinnaavoq.

Kiisalu Utoqqaat illersuisuata aqutsinermi allaffissornikkut oqartussatut aaqqissuussaanerata nassataanik, Utoqqaat Illersuisuata sulianik ingerlatsinera ombudsmandip piginnaatitaaffianut ilaavoq, tak. Inatsisartut Ombudsmandiat pillugu Inatsisartut inatsisaat nr. 7, 1. juni 2017-imeersumi § 7.

2.2. Utoqqaat illersuisuata eqqartuussivinnut aamma aqutsinermi allaffissornikkut oqartussanut attuumassuteqarnera

Siunnersuuteqarnermi siunnersuutigineqarpoq, eqqartuussiviit, Inatsisartut taakkulu sullissiviisa aamma aqutsinermi allaffissornikkut oqartussaasut, matumani naalakkersuisoqarfiit, Naalakkersuisut aamma kommunit aalajangiiffigisaat pillugit oqaaseqarsinnaannermut Utoqqaat illersuisuat piginnaatinneqassasoq.

Aqutsinermi allaffissornikkut oqartussaasut aalajangiiffigisaat pillugit oqaaseqarsinnaaneq Utoqqaat illersuisuata sulinermini piginnaatitaaffiit ilaavoq. Utoqqaat inuiaqatigiinni inissisimanerat Utoqqaat illersuisuata patajaallisassavaa. Utoqqaat pissutsinut atugaannut tunngatillugu atugassarititigut piunasaqaatit amerlanerpaartaat, amerlasuutigullu piunasaqaatit aalajangersimasut aqutsinermi allaffissornikkut oqartussaasut aalajangiinerisigut aalajangersarneqartarput. Utoqqaat illersuisuata piginnaatitaaffia aqutsinermi allaffissornikkut oqartussaasunut sanilliullugu killilersorneqarpat, taava Utoqqaat illersuisuata suliasaminik naammaginatunumik isumaginninniarnera ajornarsissaaq.

Eqqartuussiviit aalajangiineranni pisut pitsaanngitsut qulaajarneqartillugit Utoqqaat illersuisuat aamma oqaaseqarsinnaatitaasariaqarpoq. Eqqartuussiviit aalajangiinerisa inatsiseqartitsinikkut atorineqarsinnaanerit pillugu Utoqqaat illersuisuat oqaaseqarsinnaatitaassanngilaq. Akerlianik eqqartuussiviit aalajangiinermikkut qulaajagaat pillugit pisut inatsiseqartitsinikkullu inissisimanerit pillugit Utoqqaat illersuisuat isornartorsuisinnaassaaq. Eqqartuussiviit ingerlatsiviit aalajangiinerannik misiliinerannik, ingerlatsiviup naliliinera Utoqqaat illersuisuata aamma isornartorsiorsinnaavaa, tassa naliliineq ingerlatsiviup aalajangiinerannik atorunnaarsitsisinnaannginnerannik eqqartuussiviit isumaqaraluarpataluunniit. Aamma eqqartuussiviit naliliinerinnaq malillugu aalajangiussaqarfiini, eqqartuussiviit naliliinerat Utoqqaat illersuisuata nalinginnaasumik tunngaveqarluni isornartorsiorsinnaavaa. Tamatumaa aalajangiineq pineqartoq pinnagu inatsiseqartitsinermut atuuttut isornartorsiorneqarnerat nassatarissavaa.

3. Aningaasarsiorneq aamma aqutsinermi allaffissornikkut pisortanut kingunerisassat

Kommunit:

Siunnersuut kommunit aningaasaqarnerannut kinguneqassanngilaq.

Namminersorlutik Oqartussat:

Utoqqaat illersuisoqalernissaannut 2020-miit ukiumut 0,8 mio. kr.-nit immikkoortinneqarput.

Aningaasanut inatsisissatut siunnersuummi nalinginnaasumik missingersuutinut tapiliussannik missingersuorsiorfigineqartut ataasiakkaat nassuiaataannik imaqartunik kiisalu sulisussat amerlassusaannik, aningaasarsianut aningaasartuutinik, aamma aningaasartuutit Utoqqaat illersuisoqarfianut attuumassuteqartut allat allaaserineqassapput.

Isumaginninnermut aqutsisoqarfiup Utoqqaat illersuisuanut allattoqarfimmik isumaginninnissaanik siunnersuuteqartoqarnerata kingunerisaanik Namminersorlutik Oqartussat allaffissornikkut suliakkersorneqarumaarnissaat naatsorsuutigineqartariaqarpoq.

4. Aningaasat tungaasigut aamma aqutsinermi allaffissornikkut inuusutissarsiuutinik ingerlatsisunut kingunerisassat

Siunnersuut inuussutissarsiuteqartut aningaasaqarnerannut imaluunniit allaffissornerannut kinguneqanngilaq.

5. Avatangiisinut, pinngortitamut inuillu peqqissusaannut kingunerisassat

Siunnersuut avatangiisinut, pinngortitamut imaluunniit inuttaasut peqqissusaannut kinguneqanngilaq.

6. Innuttaasunut kingunerisassat

Utoqqaat atugaat aamma periarfissaat pillugit utoqqaat siunnersorneqarlutillu ilitserorneqartarnissaat siunnersuutip qulakkiissavaa. Aammattaaq peqatigiiffiit allallu utoqqarnik illersuerusuttut utoqqaat atugaat pillugit siunnersorneqarlutillu ilitserorneqarnissaat siunnersuutip ajornannginnerulersissavaa.

7. Kingunerisassat annertuut allat

Siunnersuut allanik kinguneqanngilaq.

8. Oqartussaasut kattuffiillu il.il. tusarniaavigineqarnerat

Siunnersuut tusarniutigalugu nassiunneqarpoq ulloq 8. april 2019-imi, tusarniaanermut killigitinneqarluni ulloq 13. maj 2019. Taassuma saniatigut piffissami tassani inatsisissatut siunnersuut tusarniaanerit Naalakkersuisut nittartagaanni saqqummersinneqarsimavoq.

Tusarniaanermut akissutinik suliarinninneq:

Tusarniaanermut akissutinik tiguneqarsimasunik suliarinninneq takuuk ilanngussaq 1-imi.

Tusarniaanermut akissutit siunnersuummut oqaaseqaatitallit oqaasertai tamakkerlugit ilanngunneqarput siunnersuummullu ilanngussaq 1-imi oqaaseqarfigineqarlutik.

Tusarniaanermut akissutinut oqaaseqaatit uingasumik allassimapput.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Inatsisip siunertaraa inuiaqatigiinni utoqqaat atugarisaasa soqutigisaasalu siuarsarneqarnissaat.

Siunertaq anguniarneqarpoq Utoqqaat illersuisoqarfianik pilersitsinikkut, tassaniissallutillu Utoqqaat illersuisuat allattoqarfillu. Utoqqaat illersuisuat qitiusumik allanillu akuliuffigineqarsinnaanngitsumik utoqqarnut tamanut pingaarutilittut inissisimassaaq.

Utoqqaat illersuisuata suliarissavai, utoqqaat periarfissaasa soqutigisaasalu siuarsarneqarnissaat kiisalu inuiaqatigiinni utoqqaat atugaat pillugit ilisimatitsisarnissaq, tak. § 4-mut tunngatillugu oqaaseqaatit.

Inatsit pisortani atugassiaavoq. Tamanna pisariaqarpoq inatsisiliornermi anguniakkap, utoqqaat atugaasa inuiaqatigiinni tamani siuarsarneqarnissaat anguniarlugu.

§ 2-mut

Imm. 1-imut

Utoqqaat illersuisoqarfiannik pilersitsisoqassasoq inatsimmi aalajangersarneqarpoq. Utoqqaat illersuisoqarfiat tassaavoq Utoqqaat illersuisuat allattoqarfialu.

Imm. 2-mut

Utoqqaat illersuisoqarfia Namminersorlutik Oqartussat ataanni suliffeqarfiuvoq. Tamatuma nassataanik, Namminersorlutik Oqartussat missingersuusiornermi aningaasaliissuteqartarnermilu suleriaasiannut tunngatillugu sukkulluunniit malittarisassat inassutigineqartullu atuuttut Utoqqaat illersuisoqarfiata malittussaavai, tak. §§ 12-15. Aammattaaq Utoqqaat illersuisoqarfianut Kalaallit Nunaanni Namminersorlutik Oqartussat naatsorsuutaasa saqqummiunneqartarnerannut kukkunersiorneqartarnerannullu malittarisassat atuuttut atuutsinneqassapput. Tamanna aamma suliffeqarfiup isertitaanut aamma aningaasartuutaanut atuuppoq.

Utoqqaat illersuisoqarfiata suliaqarneranut atatillugu naalackersuinermut attuumassuteqannginnissaq pisariaqarpoq, tassa pisortani oqartussanut aamma Inatsisartunut tunngatillugu Utoqqaat illersuisuat isornartorsiuisinnaammat.

Politikkimut attuumassuteqannginnerup kinguneranik, Naalackersuisut Inatsisartullu Utoqqaat illersuisuannut naalakkiisinnaatitaanngillat. Naalackersuisut Inatsisartullu aamma Utoqqaat illersuisuata oqaaseqaataanik allannguisinnaanngillat, soorlu Utoqqaat

illersuisoqarfiata suliai pillugit ingerlaavartumik nakkutiginnissinnaangitsut nakkutiginnissangitsullu.

Taassuma kinguneraa Inatsisartut inatsisaat nr. 6, 13. maj 1993-imeersoq inatsisartunut ilaasortat akisussaannerat naapertorlugu, Utoqqaat illersuisuata iliuusii pillugit akisussaassuseq Naalakkersuisut tigusinnaangikkaat. Kisianni Naalakkersuisut siunnersuut § 3, imm. 3, malillugu Utoqqaat illersuisuannik immikkut pisoqartillugu tunuartitsisinnaanermik piginnaatitaapput.

§ 3-mut

Imm. 1-imut

Utoqqaat illersuisuannik Naalakkersuisut toqqaassasut aalajangersakkami aalajangersarneqarpoq.

Imm. 2-mut

Utoqqaat illersuisuat inuttassarsioreernerup kingorna piffissaq tamakkerlugu sulisartussanngorlugu Naalakkersuisunit toqqaarneqassaaq. Utoqqaat illersuisuat akissarsiaqartinneqassaaq Kalaallit Nunaannit Naalakkersuisut atorfinitsitsinermi malittarisassat atuuttut malillugit sivisussusileriikkamillu atorfeqartussanngorlugu. Utoqqaat illersuisuata ukiut 3-t iluanni tunuartinneqarsinnaanera pillugu imm. 3 innersuussissutigineqarpoq.

Utoqqaat illersuisuat ukiunut 3-nut sivisussusileriikkamik toqqaarneqassaaq, toqqaarneqaqqissinnaallunilu.

Ukiuni 3-ni toqqaanissamut tunngavigineqarpoq Utoqqaat illersuisuata suliaasaqarfiisa annertunerat, suliaasallu paasititsiniaanikkut, oqaaseqaatitigut ingerlatitseqqittarneritigut il.il. ingerlatassat piffissaq tamakkerlugu qaffasissumik pitsaassusilimmik suliarineqarnissaat pisariaqartinneqassammat.

Utoqqaat illersuisuata pissutsit utoqqaat atugarisaannut tunngassuteqartut immikkut ilisimasaqarfigissagai naatsorsuutigineqarpoq, kiisalu inuttut, piorsarsimassutsikkut, upperisarsiornikkut allatigullu assigiinngissutsit akornanni atassuteqartitsisinnaassasoq naatsorsuutigineqarluni.

Aamma Utoqqaat illersuisuata suliaasaanut naleqquttumik Utoqqaat illersuisuat suliamigut piginnaasaqassaaq. Utoqqaat illersuisuata inatsisilerituujunissaa piumasaqaataanngilaq.

Imm. 3-mut

Aalajangersakkami uani Utoqqaat illersuisuata qanoq pisoqarnerani soraarsinneqarsinnaanera aalajangersarneqarpoq. Utoqqaat illersuisoqarfiata politikikkut attuumassuteqannginnerani,

qanoq pisoqartillugu Utoqqaat illersuisuata soraarsinneqarsinnaanera aalajangersakkakut qulakkeerneqassaaq.

Immikkoortumi 1-imit 2-mut piumasaqaatit taaneqartut tamakkiisuupput.

Nr. 1-imut

Utoqqaat illersuisuata suliassaanik ingerlatsinermi annertuumik sumiginnaanertut paasineqassaaq, kukkunernik assigiissunik arlalinnik kukkunikkut uppersarneqarsimassasoq Utoqqaat illersuisuat Utoqqaat illersuisuata suliaasa iluani suliassanut naammaginatsumik piginnaassuseqanngitsaq. Aamma kukkunerup annertuup ataatsip erseqqissisinnavaa Utoqqaat illersuisuata suliassanut tunngassuteqartunut ilisimasai amigaateqartut.

Taamaallaat pissutsit Utoqqaat illersuisuata tungaaniit naammattumik sakkortuumik sorraatsuliorfiusut Utoqqaat illersuisuata soraarsitaaneranik kinguneqarsinnaapput. Peqatigisaanik kukkunerit assigiit arlallit imaluunniit kukkuneq annertooq ataaseq isumaqalersitsinnaapput Utoqqaat illersuisuata suliassaanik Utoqqaat illersuisuat siunissami isumannaatsumik ingerlatsisinnanaviannngitsaq.

Nr. 2-mut

Utoqqaat illersuisuata iliuuseqarneratut annertuumik Utoqqaat illersuisuata suliaanik toqqissisimanartumik ingerlatsisinnaneranik nalornilersitsisutut paasineqassaaq, assersuutigalugu Utoqqaat illersuisuat iluanaarniutigalugu pinerlussimanera imaluunniit persuttaasimanera. Aamma uppersaatissaqartinneqarpat Utoqqaat illersuisuata Utoqqaat illersuisoqarfiata aningaasaataanik atornerluinera imaluunniit atorfini nammineq imaluunniit allat iluanaarnissaat anguniarlugu atornerlukkaa. Aammattaaq Utoqqaat illersuisuat imigassamik sunnerneqarsimalluni suliartorpat tamanna iliuusiussaaq Utoqqaat illersuisuata suliassaanik Utoqqaat illersuisuata siunissami isumannaatsumik ingerlatsisinnaneranut tatiginninnermik annikillisisoq.

Imm, 4-mut

Imm. 3 naapertorlugu Utoqqaat illersuisuat soraarsitaappat, taava piffissap sinneranut Utoqqaat illersuisuannik nutaamik toqqaaneq pissaaq, tak. § 3, imm. 1. Utoqqaat illersuisuat nutaaq toqqagaqqissinnaassaaq, tak. § 3, imm. 2.

§ 4-mut

Imm. 1-imut

Aalajangersakkami pineqarput Utoqqaat illersuisuata suliassai. Aalajangersagaq atituumik isigineqassaaq. Imm. 2-mi 3-milu erseqqissarneqarput Utoqqaat illersuisuata suliassat suut immikkut ittumik isumagissanerai.

Utoqqaat illersuisuata inuiaqatigiinni suliassaqarfinni tamani utoqqaat soqutigisaasa naleqquttumik isumagineqarnissaat sulissutigissavaa. Matumuuna utoqqaat pisortatigut inatsiseqartitsinikkut tunngaviusumik aamma inuttut inatsiseqartitsinikkut tunngaviusumik soqutigisaasa qulakkeerneqarnissaat aamma siuarsarneqarnissaat sulissutigineqassaaq. Utoqqaat illersuisuat aamma utoqqaat atugaannik qitiutitsissaaq paasissutissiissutigalugillu.

Atugarisat atituumik paasineqassapput, tassanilu assersuutigalugu utoqqaat inooqataanikkut, aningaasaqarnikkut, peqqissutsikkut aamma piorsarsimassutsikkut atugarisaat tamarmik pineqarput.

Utoqqaat pisinnaatitaaffii, soqutigisaat atugarisaallu pillugit Utoqqaat illersuisuata paasititsiniaanermigut, siunnersuillunilu ilitersuinermigut ilisimasanillu ingerlatitseqqittarnermigut utoqqaat pisinnaatitaaffii soqutigisaallu siuarsarsinnaavai.

Aalajangersakkami naatsorsuutigineqarpoq, aalajangersagaq malillugu Utoqqaat illersuisuata suliassani naammassisinnaassagunigit, utoqqaat atugarisaat, utoqqaat atugarisaat pillugit inatsisit atuuttut, aamma utoqqaat soqutigisaasa siuarsarniarlugit suliniutit qanoq ingerlanneqarnersut ingerlaavartumik paasiniartassagai.

Imm. 2-mut

Aalajangersakkap imm. 1-imi aalajangersakkat nalinginnaasut malippai, Utoqqaat illersuisuata suliassaanik immikkut ittumik pingaarutilinnik imaqarluni. Nr.1-imit 5-imut immikkoortut tamakkiisuunngillat.

Nr. 1-imut

Utoqqaat illersuisuata utoqqaat tamaasa illersuisuuffigissavai utoqqaallu tusaaneqarsinnaatitaanerit qulakkiissallugu.

Utoqqaat atugarisaat periarfissaallu pillugit Utoqqaat illersuisuata utoqqaat tamaasa siunnersorlugillu ilitersortassavai. Tamatuma kingunerissavaa Utoqqaat illersuisuata ersarissumik ajornanngitsumillu utoqqarnut tamanut sullissisinnaanissaa, utoqqaallu ajornartorsiutigisaminnik qaangiiniarlutik ingerlariaqqinnissaat anguniarlugu pisariaqartitaannik ikiorneqartarnissaat.

Nr. 2-mut

Taakkuninnga pineqartunut tunngatillugu aalajangersagaq tamakkiisuunngilaq. Pisortat namminersortullu tamarmik, soorlu ingerlatsiviit allat, kommunit imaluunniit peqatigiiffiit allat ilisimatinneqartarnissamik pisariaqartitsisut siunnersorneqarsinnaallutillu ilitersorneqarsinnaassapput.

Inunnut paasissutissanut tunngatillugu erseqqissaatigineqassaaq, Utoqqaat illersuisuat nipangiussisussaataammat, tak. § 11.

Nr. 3-mut

Utoqqaat illersuisuat sulinermini utoqqaat atugaasa pitsanngorsarnissaannik ukkatarinnissaaq. Utoqqaat illersuisuat utoqqaat paasilluarneqarnerunissaannik sulinissaa aalajangersakkap imaraa. Tamanna ilaatigut paasisitsiniaanikkut pisassaaq.

Nr. 4-mut

Utoqqaat illersuisuat paasissutissiisartussatut eqqarsaatigineqarpoq. Suliassaqarfiit ilaanni ilanngutsisisarnissap aalajangeeqataasarnissarlu qulakkeerneqarnissai immikkut ittumik amigaatigineqarput. Tamatuma nassataanik suliassaqarfinni utoqqaat soqutigisai sanngiilliorfiusut Utoqqaat illersuisuata immikkut ittumik eqqumaffigissavai, sanngiilliorfiusullu politikerinut, pisortatigut oqartussanut innuttaasunullu paasissutissiisutigisarlugit.

Utoqqaat illersuisuata utoqqaat soqutigisaasa, atugaasalu tamakkiisut sammisarissavai. Utoqqaat periarfissai pillugit tunngaveqarnerusumik Utoqqaat illersuisuat oqallitsitsissaaq, assersuutigalugu inuunerup isumaqarnerata, innuttaasutut inooqatigiinnerup qanoq ingerlatitaanerata aamma tarnip pissusiisa immikkoortortai il.il. ilannguttarlugit oqallitsitsisassaaq.

Taakkua saniatigut Utoqqaat illersuisuata utoqqaat siunnersortarlugillu ilitsersortassavai. Assersuutigalugu utoqqaat aviisinut, radiumut tv-mullu saaffiginnissinnaaneratt pillugu paasissutissiisassaaq. Aamma assersuutigalugu utoqqaat oqaatigerusutaminnik annissuinissaat periarfissalerlugu Utoqqaat illersuisuat nittartagaliorsinnaavoq.

Nr. 5-imut

Aalajangersagaq una utoqqaat periarfissaannik atugaannillu siuarsaavigisinnaanerannut tunngassuteqarpoq. Ilaatigut utoqqaat paaqqinniffinniittut atugaat pillugit naammaginartumik sulisoqarnerisq apeqqutaasarpog. Taamatuttaaq aalajangersakkap Utoqqaat illersuisuat tamakku pillugit siunnersuuteqarsinnaatippaa.

Utoqqaat atugarisaat pillugit pitsaanerusumik takussutissaqalerlunilu ilisimasaqalernissaaq anguniarlugi attaveqaatit paasissutissiisarfiillu assigiinngitsut Utoqqaat illersuisuata pilersissagai naatsorsuutigineqarpoq, tassa utoqqaat periarfissaannut aamma atugarisaannut nalinginnaasumik pingaaruteqarsinnaasut Utoqqaat illersuisuata suliniutit aallartissinnaassammagit.

Aalajangersakkamittaaq naatsorsuutigineqarpoq, Utoqqaat illersuisuata aalajangersagaq taanna malillugu suliassani isumagisinnaassagunigit, taava utoqqaat periarfissaat

soqutigisaallu siuarsarniarlugit suliniutit atuutereersut qanoq ingerlanneqartartut Utoqqaat illersuisuata ilisimasariaqarpai.

Imm. 3-mut

Aalajangersakkap qulakkiissavaa, Utoqqaat illersuisuata utoqqarnut atassuteqarneq pisariaqartitaq ingerlakkaa, Utoqqaat illersuisuata suliaasa utoqqaat soqutigisaat aallaavigalugit naammassineqarnissaat siunertaralugu.

§ 5-imut

Aalajangersakkap qulakkiissavaa, Utoqqaat illersuisuat pilersarusiorneranut aamma inatsiseqartitsinikkut qulaajaanernut aamma suliniutinut allanut atatillugu, utoqqaat soqutigisaat pillugit Utoqqaat illersuisuata suliamut tunngatillugu oqaaseqarsinnaatitaanissaa. Aalajangersakkap aammattaaq suliniutit taamaattut, utoqqaat atugaannut pingaarutillit, aamma inuiaqatigiinni suliniutigalugit aallartisarneqarnissaannik kissaatigineqartut pillugit ilisimatinneqartarnissaa qulakkiissavaa.

Suliniutit allat tassaapput assersuutigalugu utoqqarnut illutigut, piorsarsimassutsikkut inooqataanikkullu avatangiisit pillugit qulaajaanerit aamma pilersaarutit. Utoqqaat illersuisuat, piginnaasaqarnini malillugu, suliniutinut taamaattunut tusarniaassutinut atatillugu oqaaseqarsinnaasariaqarpoq. Utoqqaat illersuisuat taamaalilluni utoqqaat soqutigisaat pilersaarutini qulaajaanernilu assigisaannilluunniit pineqartillugit utoqqaat sinniisaattut sassarsinnaasariaqarpoq.

Utoqqaat illersuisuata nammineq aalajangertassavaa suliaq taama ittoq utoqqaat soqutigisaannut attuumassuteqarnerisooq. Utoqqaat illersuisuata taamatut naliliinermini atituumik tunngavilersuisassaaq. Taamaalilluni Utoqqaat illersuisuata oqaaseqarsinnaanera pilersaarutitut qulaajaanernullu utoqqarnut toqqaannartumik attuumasunuinnaq killilersimaneqanngilaq. Utoqqaat illersuisuat aningaasaqarnermut politikki, ineqarnermut politikki aamma suliffeqarfeqarfimmut politikki pillugit oqaaseqarsinnaatitaavoq, utoqqaat atugarisaannut sunniuteqarnerat takuneqarsinnaatillugu.

Oqartussat pilersarusiorlutik siusissukkut suliaqalerneranni utoqqaat soqutigisaannik eqqarsaateqarnissaat pillugu ilisimatitsinermigut Utoqqaat illersuisuat pilersarusiornerissamut sunniuteqarsinnaatitaasoq aalajangersakkap kinguneraa.

Pisortani oqartussat assigiinngitsut siunnersuusiorderinut nassuiaasiorderinullu Utoqqaat illersuisuat immikkut ittumik malinnaasariaqarpoq.

§ 6-imut

Aalajangersagaq § 4, imm. 2, nr. 2-mut attuumassuteqarpoq, aalajangersakkallu erseqqissarpaa, ilaatigut inuiaqatigiinni pilersaarusiortoqaraangat utoqqaat atugarisaasa soqutigisaasalu iluaquserneqarnissaat qulakkeerniarlugu, apeqqutini nalinginnaasuni inuiaqatigiinni utoqqaat atugarisaannut sunniuteqartuni tamani Inatsisartut, Naalakkersuisut, pisortatigullu oqartussat allat Utoqqaat illersuisuannik isumasiuisassasut. Aalajangersagaq malillugu naalakkersuinermi oqartussat aamma ingerlatsiviit allat saaffiginnissinnaapput. Naalakkersuinermi oqartussat ingerlatsiviillu namminneq aalajangertassavaat qaqugukkut saaffiginnissamut pissutissaqarnersoq.

Erseqqissaassutigineqassaaq, utoqqaat atugarisaannut pingaaruteqartumik inatsiseqartitsinermi suliniuteqarnermut aamma allatut suliniuteqarnermut atatillugu Utoqqaat illersuisuat tusarniarneqartassasoq, tak. § 5.

§ 7-imut

Utoqqaat illersuisuat ukiut tamaasa ukiup siuliani suliffeqarfini pillugu nalunaarummik suliartassaaq. Nalunaarusiami Utoqqaat illersuisuata ukiup siuliani suliarsimasai tamarmik imarineqartassapput.

Nalunaarusiami immikkut ilanngunneqarsinnaavoq kattuffinnit, peqatigiiffinnit, suliffeqarfinnit namminersortunit il.il. isertitaasinnaasut pillugit immikkoortoq. Kikkut tunisisimanersut, qanoq annertutigisumik aamma piumasagaatit suut tunngavigalugit aningaasaliisimanersut pillugit paasissutissat ilanngunneqassapput.

Nalunaarusiaq Utoqqaat illersuisuata nittartaagaani tamanut saqqummiunneqartassaaq, saqqummiunneqarneratalu peqatigisaanik Naalakkersuisunut, Inatsisartunut kommuninullu nassiunneqartassaaq.

§ 8-mut

Imm. 1-imut

Utoqqaat illersuisuata apeqqutinut Utoqqaat illersuisuata suliassaqarfianut tunngasuni killilersorneqarani oqaaseqarsinnaatitaavoq. Allatut oqaatigalugu, apeqqutit utoqqaat atugarisaannut, soqutigisaannullu tunngassuteqartut tamaasa pillugit Utoqqaat illersuisuat oqaaseqarsinnaavoq, tak. § 4. Taamaattoq § 11 malillugu Utoqqaat illersuisuat nipangiussisussaataavoq, suliallu inunnut aalajangersimasunut tunngassuteqartut pillugit oqaaseqarsinnaatitaanani, tassunga atatillugu ataani imm. 2-mut ersarinnerusumik oqaaseqaatigineqartut takukkit.

Utoqqaat illersuisuat nammineerluni saaffigineqarnermiluunniit kinguneranik iliuseqarsinnaavoq. Utoqqaat illersuisuat suliani saqqummiunneqartuni oqaaseqarnissamut pissusaaffeqanngilaq, takuuk § 10, imm. 2 pillugu tulluuttuni nassuiaatit.

Oqaaseqaatip kimut sammitinnissaa Utoqqaat illersuisuata nammineerluni aalajangertassavaa. Nassiussiviusinnaapput assersuutigalugu pisortat suliffeqarfiini immikkoortortat assigiinngitsunik suliallit, kattuffiit namminersortut, niuerneramik ingerlataqartut il.il. Taamaattumik Utoqqaat illersuisuat pisussaatitaanngilaq oqaaseqaatimi ingerlatsivinnut ingerlatinnissaanut, namminersortunulli, tusagassiutininut il.il. suliani, taakkununga naleqqunnerpaatut isumaqarfigisaminut ingerlatissinnaallugit.

Utoqqaat illersuisuata oqaaseqaataasa ilusissaanut aalajangersimasunik ilusilersorneqarnissaat piunasaqaataanngilaq. Utoqqaat illersuisuata sunniuteqarnerpaamik isummaminik saqqummiussinissani aalajangersinnaavaa, assersuutigalugu tusagassiutininut nalunaarusiornikkut, oqalugiarnikkut, apersorneqarnikkut, oqallinnermi peqataanikkut aamma tv-kkut aallakaatitassiatigut peqataanikkut.

Oqaaseqaatit inatsisitigut pituttuisuunngillat, tassa aalajangerunngillat, akerlianilli tiguisissamut ilitsersuisuullutik. Utoqqaat illersuisuata oqaaseqaataasa annerusumik malinnaaffigineqartarnissaanut, minnerpaamilluunniit arlaatigut sunniuteqartarnissaanut, Utoqqaat illersuisoqarfianut pingaaruteqassaaq.

Utoqqaat illersuisuat sulianik aalajangiinissamut pisinnaatinneqanngilaq, imaluunniit ingerlatsiviit aalajangiussaannik allanngortitsisinnaatitaanngilaq. Taamatut oqartussaassuseqarneq oqartussaassuseqarnermut tunngasuni nalornilersitsisinnaavoq.

Taamattaq Utoqqaat illersuisuat pissutsinut eqqartuussivinni aalajangerneqareersunut, aalajangigassanngorlugilluunniit eqqartuussivinnut anngunneqartut inatsisinik unioqquitsinnginnersut pillugu oqaaseqarsinnaanngilaq. Taamattaarlu Utoqqaat illersuisuat suliani utoqqaap pineqaatissiisutaasumik iliuseqarfigisimasaani pasineqarfigisaanilu suliamiluunniit unnerluunneqarfigisaani, politiinit misissuiffigineqartuni oqaaseqarsinnaanngilaq. Utoqqaat illersuisuata pisut aalajangersimasut inatsiseqartitsinermiluunniit qanoq issusaat, eqqartuussiviit aalajangiineranni politiilluunniit misissuineranni qulaajarneqartut isornartorsiorsinnaavai.

Utoqqaat illersuisuat assersuutigalugu kommunit aalajangersimasut utoqqarnut politikkiat pillugu oqaaseqarsinnaavoq. Tamanna Utoqqaat illersuisuata immikkoortunut kommunimi isumaqatigiiffiunngitsunut akuliunneranik nassataqarsinnaavoq. Utoqqaat illersuisuat suliani taakkunani oqimaatigiittumik kinaassusersiunngitsumillu pissusilersortariaqarpoq, paasissutissallu pissarsiarineqarsinnaasut tamaasa toqqammavigalugit naliliisassalluni.

Utoqqaat illersuisuata suliassai piginnaasaalu, Inatsisartut inatsisaanni uani nassuiarneqartut, taamaalillutik illersorneqarsinnaasumik sulianik isumaginninnissamut annertuumik piunasaqarfiupput.

Imm. 2-mut

Pissutsit nalinginnaasumik utoqqarnut tunngassuteqartut tassaapput, pissutsit utoqqarnut tamanut utoqqarnulluunniit eqimattanut tunngassuteqartut, tassa utoqqaap ataasiinnaap atugarisaanut tunngassuteqanngitsut. Taamaalilluni Utoqqaat illersuisuat utoqqaap aalajangersimasup atugaanut tunngasunik oqaaseqarsinnaanngilaq, utoqqarmilli saaffiginnissutip, Utoqqaat illersuisuat ajornartorsiut utoqqarnut amerlasuunut atuunnersoq naliliiffiginiarlugu ajornartorsiummik misissuitissinnaavaa, tamatumalu nassatarisaanik Utoqqaat illersuisuat tamanut tunngasumik oqaaseqarsinnaalluni. Taamaalilluni Utoqqaat illersuisuat pissutsinut nalinginnaasumik atuuttunut suliaqartassaaq, sulianilli inunntut ataasiakkaanut tunngasunik aallaaveqarsinnaalluni.

Aammattaq aalajangersagaq malillugu, sammisassat utoqqarnut nalinginnaasumik tunngassuteqartut Utoqqaat illersuisuata suliassanngortissinnaavai. Assersuutigalugu sammineqarsinnaapput piitsuussutsumik ajornartorsiuteqarneq imaluunniit peqqissutsimut tunngatillugu ikiorsiissutisisinnaaneq.

Imm. 3-mut

Aalajangersakkap erseqqissarpaa, Utoqqaat illersuisuat suliani aalajangiisinnaanngitsoq, kisiannili pissutsit taamaallaat oqaaseqarfigisinnaagai. Aamma siuliini imm. 1-imut aamma imm. 2-mut aammalu § 10 imm. 4-mut oqaaseqaatinut innersuussisoqassaaq.

§ 9-mut

Utoqqaat illersuisuata allattoqarfiata suliassaanik suliarinninnerup Isumaginninnermut aqutsisoqarfimmit suliarineqarnerani ilaatigut allaffeqarneq aamma allaffissornikkut kiffartuussineq, ilaatigut isumaginninnermi sullissinerit, utoqqarnut suliassaqarfimmut pingaaruteqartut, ilaatinneqarput.

Maani allattoqarfiup sumerpiaq inissinneqarnissaa pillugu aalajangiisoqanngilaq, tassami qitiusumik allattoqarfimmi isumaginninnermut aqutsisoqarfimmiittumi, inatsisillu atuutilernerani Nuummiittumi, inissinneqarnissaa aalajangersakkami piumasqaataanngimmat. Aningaasanut inatsimmi allattoqarfeqarnissamut aningaasaliissutit iluanniissinnaappat, allattoqarfiup sulianut tunngatillugu sullissineranut suliassaanullu allanut naleqqunnerpaasumik allattoqarfimmi suliassat inissinneqassapput. Utoqqarnut illersuisup sumi inissinneqarnera apeqqutaatillugu, piffimmi, mail atorlugu, oqarasuaatikku imaluunniit video atorlugu ataatsimiinnernut atortut atorlugit, allaffissornikkut ikiorsiineq pisarsinnaavoq.

§ 10-mut

Imm. 1-imut

Pisortat ingerlatsiviini sulianik suliarinnittarneq pillugu Inatsisartut inatsisaata toqqaannartumik Utoqqaat illersuisuata aamma allattoqarfiup sulianik ingerlatsinerani atorneqarsinnaanngiffiani, Inatsisartut inatsisaanni tunngaviit, kiisalu ingerlatsineq pillugu inatsiseqartitsinermi tunngaviit inatsisikkut aalajangersagaanngitsut atuutsinneqassapput.

Pisortat ingerlatsineranni suliassat suliarineqartarneri pillugit Inatsisartut inatsisaat nr. 8, 13. juni 1994-imeersoq kingusinnerusukkut allannguuteqartinneqartoq, suliat suliarineqartarnerat pillugu inatsit, taamaallaat atorneqartarpoq suliani aalajangiiffigeriikkani imaluunniit ingerlatsineq pillugu inatsiseqartitsinermik aalajangiisoqassatillugu. Utoqqaat illersuisuata oqaaseqaatai aalajangiinertaqanngillat. Taamaattumik sulianik suliarinnittarnermi inatsit Utoqqaat illersuisuata oqaaseqaataanut toqqaannartumik atorneqarneq ajorpoq, taamaallaalli atorneqartarluni sulianik suliarinnittarnermut inatsimmi kapitali 8 malillugu nipangiussisussaataaneq pineqartillugu, tak. sulianik suliarinnittarnermi inatsimmi § 2, imm. 3 aamma sulianik suliarinnittarnermi kap. 2-mi suliassat isumaqatigiissusiornernut imminullu inatsisitigut tunngasuni suliarineqarneranni peqataasinnaannginnermik aalajangersagaq, tak. sulianik suliarinnittarnermi inatsimmi § 2, imm. 2.

Pissutsini, Utoqqaat illersuisuata suliassamik suliaqarnermi ingerlatsineq pillugu inatsiseqartitsinermik aalajangiiffiginngisaani, aalajangersakkap nassataraa, Utoqqaat illersuisuata peqataasinnaannginnermut, ilitersuisussaataaneq, illuatungerisamik tusarniaanissamut aammalu tunngavilersuinissamut kiisalu nipangiussisussaataaneq tunngavinnik malinninnissaq naammassissagaa, taamaaliornissaq Utoqqaat illersuisuata immikkut ittumik atuuffianut aamma suliffianut attuumassuteqartutut isigineqarpat.

Naammagittaalliorsinnaanermut ilitersuummik tunniussaqaarnissamut pisussaataaffimmut tunngavik Utoqqaat illersuisuata oqaaseqaataanut tunngatillugu sunniutissartaqanngilaq, tassami oqaaseqaatai naammagittaalliutigineqarsinnaanngimmata.

Ingerlatsineq pillugu inatsiseqartitsinermi tunngaviit inatsisikkut aalajangersagaanngitsut pineqartillugit, matumani assersuutigalugu piviusorsiuunngitsunik ilanngussaqaarnissamut inerteqqut, aammattaaq naatsorsuutigineqarpoq, taakkua Utoqqaat illersuisuata assinganik pisariaqartinneqarnerat malillugu atortinniarai, taakkua Utoqqaat illersuisuata suliassanik suliaqarneranut attuumassuteqartutut isigineqarpata aamma Utoqqaat illersuisuata immikkut suliaanut suliffeqarfianullu atussallugit naleqquttuuppata. Tamatuma pissuseqataa ingerlatsinermi ileqqorissaarnermik tunngavinnut ingerlatsineq pillugu inatsisini taaneqanngitsunut aamma atuuppoq, matumani ilaatigut ingerlatsiviup inussiarnersuunissaanik, mianerinnittuunissaanik tatiginninnermillu pilersitsisuunissaanik piunasaqaatit kiisalu angusaqarluartarnissamik toqqissisimanartunillu periaaseqaarnissamik piunasaqaatit ilanngullugit eqqarsaatigalugit.

Pissutsini Utoqqaat illersuisuata ingerlatsineq pillugu inatsiseqartitsinermik aalajangiiffiginngisaani, sulianik suliarinnittarnermut inatsimmi tunngavinnik, kiisalu

ingerlatsineq pillugu inatsiseqartitsinermi tunngavinnik inatsisikkut aalajangersagaannigitsunik sumiginnaasoqassagaluarpat, assersuutigalugu Utoqqaat illersuisuata oqaaseqaataanut tunngatillugu, atorsinnaanngitsutut taallugit kinguneqartitsisoqarsinnaanngilaq.

Aammattaaq oqaatigineqassaaq, Utoqqaat illersuisoqarfiata, tassunga ilanngullugu Utoqqaat illersuisuata sulinera toqqaannartumik pisortat ingerlatsivii pillugit Inatsisartut inatsisaannut ilaammata (paasitinneqarsinnaatitaaneq pillugu inatsit), tak. paasitinneqarsinnaatitaaneq pillugu inatsimmi § 1.

Imm. 2-mut

Utoqqaat illersuisuata piffissami qaqugukkulluunniit suliaq tunuartikkallarlugi inissinnaavaa. Utoqqaat illersuisuata suliaq tunuartikkallarlugi inissinneqarsimasoq qaqugu suliarineqaqqilissanersoq nammineq aalajangersinnaavaa.

Utoqqaat illersuisuata assersuutigalugu saaffiginnissutit, Utoqqaat illersuisuat isumaqarpat saaffiginnissummi pissutsit pineqartut isorisarialittut imaluunniit malitseqartitsivigineqarnissamik tunngavissiinnigitsut, itigartissinnaavai. Utoqqaat illersuisuata aamma saaffiginnissutit, saaffiginnissummi pissutsit pineqartut aaqqinneqarsimappata imaluunniit taamaatissimappata, itigartissinnaavai.

Saaffiginnissut pissutsinut, oqartussaasunut allanut imaluunniit immikkut nakkutilliisutut suliaqarfimmut suliassanngortinneqarsinnaasunut, tunngassuteqarpat, Utoqqaat illersuisuata suliami pissutsinik misissuilluareernermigut suliaq oqartussaasunut susassalinnut nassiussinnaavaa, sulianik suliarinnittarnermut inatsimmi piunasaqaatit naammassineqarsimappata. Utoqqaat illersuisuata sulianik suliarinnittarnernut inatsimmi tunngavinnut ilaananut imm. 1-mi oqaaseqaatit innersuussutigineqarput.

Utoqqaat illersuisuata suliassat Utoqqaat illersuisuata suliassaqaarfiinut tunngassuteqaanngitsut itigartittassavai, tak. § 4.

Imm. 3-mut

Utoqqaat illersuisuata Utoqqaat illersuisuanut saaffiginnissimasoq suliap tunuartinneqarneranut imaluunniit unitsinneranut suna tunngavigineqarnerasoq pillugu ilisimatissavaa, aammalu sulianik taamaattunik suliarinninnissamut pisussaaffeqarsinnaasut pillugit nalinginnaasumik ilisimatitsissalluni.

Imm. 4-mut

Utoqqaat illersuisuata sulianik saaffiginnissutinik tunuartsinera unitsitsineraluunniit Naalackersuisunut imaluunniit aqutsinermi allaffissornikkut oqartussanut allanut naammagittaalliutigissallugu periarfissaqaanngitsoq aalajangersarneqarpoq. Aamma tamanna atuuppoq Utoqqaat illersuisuata oqaaseqaataanut.

§ 11-mut

Aalajangersakkami Utoqqaat illersuisuata allattoqarfiullu nipangiussisussaataitanerat pineqarpoq.

Aalajangersakkami Utoqqaat illersuisuata allattoqarfiullu pisortat ingerlatsiviini sulinermi Inatsisartut inatsisaanni nipangiussisussaataaneq pillugu malittareqqusat atuuttut malillugit nipangiussisussaataitanerat aalajangersarneqarpoq. Sulianik suliarinnittarnermut inatsit kapitali 8 innersuussutigineqarpoq, Utoqqaat illersuisuannut aamma allattoqarfimmut atuuttoq, tak. sulianik suliarinnittarnermut inatsimmi § 2. imm. 3.

Aalajangersakkap sakkortuumik erseqqissassavaa Utoqqaat illersuisuat allattoqarfialu nipangiussisussaataitanerannut tunngaviusoq tassaammat pisortat ingerlatsiviini suliffeqarnerat.

§ 12-imut

Imm. 1-imut

Aalajangersakkami aalajangersarneqarpoq Utoqqaat illersuisoqarfiat nammineq immikkut nunatta karsianit aningaasaliiffigineqartartoq.

Imm. 2-mut

Aalajangersakkap qulakkeerinneqataaffigissavaa, Utoqqaat illersuisuata, aningaasanut inatsimmit aningaasaliiffigineqarnerup saniatigut, allanit aningaasalersorneqarsinnaanissaata periarfissinneqarnera aqutigalugu, naalakkersuinermit attuumassuteqannginnerata malunnartinneqarlunilu tunngavilerneqarnissaa. Utoqqaat illersuisuata taamaalilluni suliniutitit ingerlatani, matumani paasititsiniaanerit il.il., aningaasalersorsinnaavai kattuffinnit namminersortunit, aningaasaateqarfinnit, pisortatut oqartussaasunit il.il. avataaniit aningaasaliisoqarneratigut.

Imm. 3-mut

Utoqqaat illersuisuata suliassaasa iluanni Utoqqaat illersuisuata isertitaqarfiusumik ingerlataqarsinnaanera aalajangersakkami aalajangersarneqarpoq. Assersuutigalugu Utoqqaat illersuisuata naqitat saqqummersitani tuniniarsinnaavai.

§ 13-imut

Imm. 1-imut

Aalajangersagaq ilanngunneqarpoq, Naalakkersuisut, ukiumut aningaasaliiffiusumut tullermut Utoqqaat illersuisuata missingersuutinut tapiissutinullu siunnersuutai tunuliaqutaralugit,

missingersuutit aningaasartaasa qanoq annertutiginissaannik Aningaasanut Inatsimmut saqqummiunneqartussat pillugit aalajangiisinnaaqullugit.

Aalajangersakkami aalajangersarneqarpoq, Utoqqaat illersuisuat tassaasoq aningaasatigut missingersuutitinnik tunniussaqtartussaq. Tamatumunnga tunngavilersuutigineqarpoq Utoqqaat illersuisua taannaammat Utoqqaat illersuisoqarfiani aningaasatigut akisussaasoq qullerpaq, tak. § 15-imut oqaasertaliussat. Aalajangersakkalli Naalakkersuisut aningaasanut inatsisissatut siunnersuutikkut Utoqqaat illersuisuanut tapiissutissanik, Utoqqaat illersuisuata missingersuutissatut siunnersuusianit allaanerumik siunnersuusiornissamik mattutinngilai.

Imm. 2-mut

Utoqqaat illersuisuata missingersuutitinnik aamma nunatta karsiata ukiumut tulliuuttumut tapiissutissaasa annertussusissaannut missingersuutit tunniunnissaannut Naalakkersuisut piffissamik killiliissapput.

§ 14-imut

Imm. 1-imut

Aalajangersakkami erseqqissarneqarpoq Utoqqaat illersuisuata naatsorsuutaasa ukioq naatsorsuuteqarfiusoq malissagaat. Utoqqaat illersuisuata aammattaaq Kalaallit Nunaanni Namminersorlutik Oqartussat naatsorsuutaasa saqqummiunneqartarnerannut kukkunerisiorneqartarnerannullu malittarisassat atuuttut atuutsinneqassapput. Tamanna aamma ingerlatsiviup isertitaanut aamma aningaasartuutaannut atuuppoq. Ukiumut naatsorsuutitigut Naalakkersuisut aamma Inatsisartut takusinnaassavaat, Utoqqaat illersuisuata sulineranut aningaasatigut atugassiissutit qanoq atorneqarsimanersut.

Imm, 2-mut

Nunatta karsiata kukkunerisuiusua kukkunerisuiusutut atorneqassaaq. Taamaalilluni nunatta karsiata kukkunerisuiusua Kalaallit Nunaanni Namminersorlutik Oqartussat suliffeqarfiutaasa malittarisassanik toqqammavigisaanik ilisimaarinninnera pingaartinneqarpoq. Aammattaaq pingaartinneqarpoq, akissarsiaqartitsineq aningaasartuutillu allat Utoqqaat illersuisoqarfianut attuumassuteqartut Namminersorlutik Oqartussat aqutsinermi allaffissornikkut sullissiviannit isumagineqassapput. Taamaalilluni namminerisamik naatsorsuuserivimmik akissarsialeriffimmillu pilersitsisoqassanngilaq. Kukkunerisuiunermut atasut aningaasartuutit Utoqqaat illersuisuannit ukiumut aningaasaliissutit iluanni akilerneqassapput.

§ 15-imut

Utoqqaat illersuisuata naatsorsuutitinnik ukiumoortunik saqqummiussineranut tunngatillugu suleriesissaq aalajangersakkap oqaatigaa.

Utoqqaat illersuisuat ukiumoortumik naatsorsuutitinnik kukkunerisuiusut oqaaseqaataanik ilaqartinneqartunik saqqummiussisassasoq aalajangersarneqarpoq. Tamanna Utoqqaat

illersuisuata Utoqqaat illersuisoqarfianut aningaasaqarnikkut akisussaasuuneranik toqqammaveqarpoq.

Utoqqaat illersuisuata aningaasaqarnikkut akisussaasuunerata, Utoqqaat illersuisuata malittarisassat sukkulluunniit atuuttut kiisalu Namminersorlutik Oqartussat naatsorsuutaat pillugit Namminersorlutik Oqartussat missingersuutitut aningaasaliissuteqartarnermullu aaqqissuussineranut malittarisassiat malitsinneqarnerannut akisussaasuuneranik nassataqarpoq.

§ 16-imut

Imm. 1-imut

Inatsisartut inatsisaata 1. januaari 2020-mi atuutilernissaa siunnersuutaavoq.